

alto, que permitan alcanzar, de acordo co establecido no título VIII deste regulamento.

Disposición derradeira única. *Aplicación supletoria.*

No non establecido no capítulo III do título IX serán de aplicación aos procedementos sancionadores tramitados pola Axencia Española de Protección de Datos as disposicións contidas no Regulamento do procedemento para o exercicio da potestade sancionadora, aprobado polo Real decreto 1398/1993, do 4 de agosto.

MINISTERIO DA PRESIDENCIA

983 *REAL DECRETO 37/2008, do 18 de xaneiro, polo que se adoptan as medidas necesarias para a aplicación efectiva do Regulamento (CE) n.º 1082/2006, do Parlamento Europeo e do Consello, do 5 de xullo de 2006, sobre a Agrupación Europea de Cooperación Territorial (AECT).* («BOE» 17, do 19-1-2008.)

No continente europeo a cooperación territorial, e en especial a transfronteiriza, impulsouse e desenvolveuse ao fío das iniciativas adoptadas polo Consello de Europa e, singularmente, a partir da sinatura do Convenio marco europeo sobre cooperación transfronteiriza entre comunidades ou autoridades territoriais, promovido por esta organización internacional, feito en Madrid o 21 de maio de 1980, asinado por España o 1 de outubro de 1986 e ratificado o 10 de xullo de 1990.

En aplicación deste convenio marco, España ratificou os tratados de cooperación bilateral coa República Francesa, en Baiona, o 10 de marzo de 1995; e coa República de Portugal, en Valencia, o 3 de outubro de 2002, ambos os dous en vigor nestes momentos.

De conformidade co establecido nestes dous tratados, e na normativa española de desenvolvemento, as autoridades territoriais españolas despregaron unha considerable acción de cooperación transfronteiriza, que se foi perfeccionando co paso dos anos e grazas á experiencia acumulada durante este período de tempo.

Por outro lado, nos últimos anos, e de forma paulatina, alcanzou un notable desenvolvemento a dimensión rexional e local do proceso de integración comunitario; un de cuxos resultados foi a adopción do Regulamento 1082/2006 do Parlamento Europeo e do Consello, do 5 de xullo de 2006, sobre a Agrupación Europea de Cooperación Territorial (AECT).

O citado regulamento regula no ámbito comunitario unha nova figura, de carácter facultativo, e con personalidade xurídica propia, para ser o instrumento adecuado para o desenvolvemento de actividades en réxime de cooperación con entidades doutros Estados.

A Agrupación Europea de Cooperación Territorial persegue o reforzamento da cohesión económica e social e é concibida no regulamento como un instrumento para o desenvolvemento de iniciativas de cooperación territorial, xa sexa cofinanciadas pola Comunidade, conforme o establecido no Regulamento (CE) n.º 1083/2006 do Parlamento Europeo e do Consello, do 5 de xullo, relativo ao Fondo de Desenvolvemento Rexional, ou para levar a cabo accións de cooperación territorial por iniciativa exclusiva dos Estados membros ou das súas autoridades rexionais ou locais, sen intervención financeira da Comunidade.

O artigo 16 prevé que os Estados membros adoptarán todas as disposicións adecuadas para garantir a aplicación efectiva do citado regulamento polo que se considera necesaria a aprobación dunha norma interna de carácter xeral que precise o procedemento que hai que seguir para facilitar a constitución e o funcionamento das agrupacións europeas de cooperación territorial que se poidan constituír conforme o dereito español ou nas que vaian participar entidades públicas españolas.

A regulación contida neste real decreto xustifícase de modo prevalente na competencia estatal en materia de relacións internacionais, que habilita as institucións estatais -neste caso o Goberno de España- para ordenar e coordinar as actividades con relevancia externa das comunidades autónomas -así como das restantes entidades territoriais- de forma que non condicionen ou prexudiquen a dirección da política exterior, de competencia exclusiva do Estado, de acordo co establecido pola xurisprudencia constitucional. Así mesmo, polo que se refire a aqueles extremos do real decreto que conteñen normas sobre o procedemento que hai que seguir para a constitución e funcionamento das citadas entidades de cooperación territorial, teñen a consideración de bases do réxime xurídico das administracións públicas.

No proceso de elaboración deste real decreto foron consultadas as comunidades autónomas, a través da Conferencia para Asuntos Relacionados coas Comunidades Europeas; así como as entidades locais, a través da Comisión Nacional de Administración Local.

Na súa virtude, por iniciativa da ministra de Administracións Públicas, por proposta dos ministros de Asuntos Exteriores e de Cooperación, de Economía e Facenda e de Administracións Públicas, de acordo co Consello de Estado e logo de deliberación do Consello de Ministros na súa reunión do día 18 de xaneiro de 2008,

DISPONGO:

Artigo 1. *Obxecto.*

Este real decreto ten por obxecto garantir a aplicación efectiva do Regulamento n.º 1082/2006 do Parlamento Europeo e do Consello, do 5 de xullo de 2006, sobre a Agrupación Europea de Cooperación Territorial, a partir deste momento denominada «AECT».

Artigo 2. *Natureza.*

As agrupacións europeas de cooperación territorial son persoas xurídico-públicas, constituídas por entidades ou organismos de, polo menos, dous Estados membros da Unión Europea, que teñen por obxecto facilitar e fomentar a cooperación transfronteiriza, transnacional e interrexional, co fin exclusivo de reforzar a cohesión económica e social.

Artigo 3. *Suxeitos.*

1. A AECT estará integrada por membros, dentro dos límites das súas competencias conforme a lexislación nacional, pertencentes a unha ou máis das seguintes categorías:

- a) Estados membros da Unión Europea;
- b) Comunidades autónomas;
- c) Entidades locais;
- d) Organismos de dereito público para os efectos do artigo 1, número 9, parágrafo segundo, da Directiva 2004/18/CE do Parlamento Europeo e do Consello, do 31 de marzo de 2004, sobre coordinación dos procedementos de adxudicación dos contratos públicos de obras, de subministración e de servizos.

Poderán tamén ser membros as asociacións formadas por organismos pertencentes a unha ou máis destas categorías.

2. A AECT estará constituída por membros situados no territorio de polo menos dous Estados membros.

Artigo 4. *Presentación da solicitude.*

1. Con carácter previo á creación dunha AECT, a entidade española que pretenda participar nesta notificaralle ao Ministerio de Administracións Públicas a súa intención de participar mediante a presentación dunha solicitude acompañada da seguinte documentación:

a) O texto do convenio proposto, que será elaborado de acordo co artigo 8 do Regulamento (CE) n.º 1082/2006 do Parlamento Europeo e do Consello, do 5 de xullo de 2006, sobre a Agrupación Europea de Cooperación Territorial.

b) Os estatutos propostos, que se elaborarán de acordo co establecido no artigo 9 do citado regulamento comunitario.

c) Se é o caso, a documentación acreditativa da personalidade xurídica dos futuros membros, así como da posible limitación de responsabilidade.

d) A certificación que acredite o acordo do Consello de Goberno, do Pleno do Concello ou do órgano correspondente, coa participación da entidade concernida na AECT.

2. No suposto da incorporación dun novo membro español a unha AECT xa constituída, o futuro membro deberalle comunicar ao Ministerio de Administracións Públicas a súa intención de participar nesta co obxecto de proceder ao inicio do procedemento de autorización mediante a presentación dunha solicitude acompañada da documentación sinalada no punto anterior.

Artigo 5. *Informes.*

1. Unha vez recibida a solicitude, o Ministerio de Administracións Públicas solicitará a emisión dos correspondentes informes por parte dos ministerios competentes por razón da materia.

2. Serán preceptivos, en todos os casos, os informes do Ministerio de Asuntos Exteriores e Cooperación e do Ministerio de Economía e Facenda.

3. O Ministerio de Asuntos Exteriores e Cooperación, unha vez recibida a solicitude de informe, comunicarlles aos demais Estados membros afectados as solicitudes recibidas en España en que se proxecte a participación nunha AECT dalgunha entidade dos ditos Estados, e dará traslado das comunicacións recibidas destes aos restantes departamentos e administracións públicas implicados.

4. O informe do Ministerio de Economía e Facenda será vinculante polo que respecta ao uso de fondos comunitarios ou da Administración xeral do Estado, dos seus organismos públicos ou das demais entidades de dereito público.

5. Así mesmo, será preceptivo o informe da comunidade autónoma en relación coas solicitudes de AECT en que estean integrados algún dos suxeitos a que se refire o artigo 3 deste real decreto correspondentes ao seu ámbito territorial.

6. En aplicación do principio de lealdade institucional, as administracións públicas interesadas intercambiarán información relevante para o eficaz exercicio das facultades conferidas por esta norma.

Para tal efecto, a Administración xeral do Estado trasladará ás comunidades autónomas a información de que dispoña a través da Secretaría da Conferencia para Asun-

tos Relacionados coas Comunidades Europeas, e ás entidades locais, a través da Secretaría da Comisión Nacional de Administración Local.

Artigo 6. *Resolución.*

1. Recibidos os informes sinalados no artigo anterior, ou transcorrido o prazo dun mes sen que se tramitasen, salvo que se trate de informes preceptivos determinantes para a resolución do procedemento, a Secretaría de Estado de Cooperación Territorial formulará unha proposta de resolución.

2. A resolución da autorización corresponderalle ao Consello de Ministros, por proposta do titular do Ministerio de Administracións Públicas, no suposto de que un dos integrantes futuros da AECT sexa un Estado, un órgano de Administración xeral do Estado ou un organismo de dereito público dependente deste, ou unha ou varias comunidades autónomas ou os seus organismos públicos dependentes.

A dita resolución corresponderalle ao titular do Ministerio de Administracións Públicas nos demais casos.

3. O prazo máximo para a resolución do procedemento será de tres meses a partir da presentación dunha solicitude conforme o previsto no artigo 4. Transcorrido este prazo sen que se ditase resolución, a solicitude entenderase estimada.

4. A resolución que poña fin ao procedemento autorizará ou denegará a participación do membro español na AECT proxectada, tendo en conta, entre outras, as seguintes circunstancias:

a) A adecuación da natureza e o obxecto do proxecto da AECT á finalidade de reforzar a cohesión económica e social.

b) A adecuación do contido do convenio de constitución da AECT e dos seus estatutos ás disposicións do Regulamento (CE) n.º 1082/2006, do Parlamento Europeo e do Consello, do 5 de xullo de 2006, sobre a Agrupación Europea de Cooperación Territorial.

c) A capacidade dos membros para participar na AECT, así como a ausencia de prohibición á limitación da súa responsabilidade, e á súa viabilidade.

d) A adecuación dos obxectivos e fins á organización e repartición competencial interna.

5. Transcorrido o prazo dun ano desde a emisión da autorización sen que se constituise a AECT proxectada, producirase a caducidade da autorización concedida.

Artigo 7. *Rexistro de AECT.*

1. Créase, no Ministerio de Asuntos Exteriores e Cooperación, un Rexistro de Agrupacións Europeas de Cooperación Territorial, de carácter público, dependente da Secretaría Xeral Técnica do dito departamento.

2. Deberanse inscribir no dito rexistro o convenio e os estatutos de cada unha das AECT con domicilio social en España, así como as súas modificacións.

3. A inscrición realizarase unha vez acreditada a concesión da autorización a todos os membros da AECT proxectada mediante a remisión ao Ministerio de Asuntos Exteriores e Cooperación do texto suscrito do convenio e dos correspondentes estatutos e, se é o caso, das autorizacións pertinentes.

4. No suposto de que a AECT non teña o seu domicilio social en España, os seus membros constituídos conforme o dereito español deberanlle notificar ao Ministerio de Asuntos Exteriores e Cooperación toda a información relativa á data de publicación e/ou rexistro no Estado onde teña o seu domicilio social e remitirán copia do convenio suscrito e dos correspondentes estatutos.

5. O Ministerio de Asuntos Exteriores e Cooperación dará traslado ao Ministerio de Administracións Públicas de todas as inscricións efectuadas no rexistro, así como das súas modificacións.

6. A inscrición no Rexistro habilita a correspondente AECT para efectuar as actuacións administrativas necesarias para poder levar a cabo a actividade para a que foi constituída.

Artigo 8. *Modificación do convenio e dos estatutos.*

1. Calquera modificación do convenio e dos estatutos da AECT deberalle ser comunicada ao Ministerio de Administracións Públicas. Toda modificación do convenio ou toda modificación substancial dos estatutos da AECT deberá ser igualmente aprobada polo órgano que resolverse a autorización conforme o artigo 6.2 deste real decreto.

2. Son modificacións substanciais dos estatutos aquelas que supoñan, directa ou indirectamente, unha modificación do convenio.

En todo caso, terán o carácter de modificación substancial:

- a) A alteración dos procedementos de toma de decisións da AECT.
- b) A alteración das modalidades de contribución financeira dos membros e as normas orzamentarias e contables aplicables.
- c) A alteración das modalidades de responsabilidade dos membros.
- d) A alteración dos procedementos de modificación dos estatutos.

Artigo 9. *Publicación.*

A publicación dos estatutos das AECT con domicilio social en España, así como as súas modificacións, realizaras o Ministerio de Asuntos Exteriores e Cooperación no «Boletín Oficial del Estado» unha vez remitida a documentación prevista no artigo 7.3.

Artigo 10. *Control da xestión de fondos públicos.*

1. O control das actuacións financiadas total ou parcialmente con cargo a fondos comunitarios desenvolveuse de acordo co establecido no ordenamento xurídico comunitario, e no marco das normas de transposición e desenvolvemento do dereito comunitario en materia de control de fondos comunitarios levado a cabo no dereito interno. En todo caso, o control realizarase de acordo coa distribución de competencias entre os distintos órganos de control das administracións públicas que participen na AECT.

2. Cando o domicilio social da AECT radique en España, o texto do convenio ou os estatutos propostos no procedemento de solicitude previsto no artigo 4 deste real decreto indicarán a autoridade competente en materia de control financeiro e auditoría de contas da AECT. A designación da dita autoridade realizarase antes de dar a súa aprobación á participación na AECT e recaerá, en todo caso, nun ou máis órganos das administracións públicas que, de acordo coa lexislación interna, teña atribuídas competencias en materia de control financeiro e auditoría do sector público. No caso de nomeamento dunha pluralidade de órganos, o convenio ou os estatutos establecerán as regras para a toma de decisións en forma colexiada.

3. A autoridade designada informará os outros Estados interesados das incidencias detectadas na realización dos controis de xestión de fondos.

Artigo 11. *Supervisión da actividade da AECT.*

O Consello de Ministros poderá prohibir toda actividade da AECT en territorio español que contraveña as disposicións internas en materia de orde pública, seguranza pública, sanidade pública ou moralidade pública, así como as contrarias ao interese público; ou, se é o caso, solicitar aos membros españois da AECT a súa retirada dela, a menos que a AECT poña fin a estas actividades.

Artigo 12. *Disolución.*

1. A disolución da AECT poderase producir por algunha das causas previstas no convenio de constitución e deberá ser inscrita no Rexistro de Agrupacións Europeas de Cooperación Territorial, nos termos establecidos no artigo 7 deste real decreto. A disolución producirá efectos a partir do momento en que sexa publicada no «Boletín Oficial del Estado», nos termos previstos no artigo 9 deste real decreto.

2. Así mesmo, o Consello de Ministros, ben por iniciativa propia, ben logo de solicitude do Goberno do Estado membro, da Comisión Europea ou de calquera autoridade competente española cun interese lexítimo, poderá acordar a disolución da AECT con domicilio social en España, se se apreciase un incumprimento dos obxectivos ou das funcións establecidos, respectivamente, nos artigos 1.2 e 7 do Regulamento (CE) n.º 1082/2006 do 5 de xullo de 2006, sobre a Agrupación Europea de Cooperación Territorial.

3. Con carácter previo á disolución, o Consello de Ministros formulará requirimento á AECT para que regularice a situación no prazo máximo dun mes, procedendo a decretar a súa disolución se o dito requirimento non é atendido.

4. O Ministerio de Asuntos Exteriores e Cooperación informará a todos os Estados membros en virtude de cuxa lexislación se asociasen os membros dunha AECT de calquera solicitude de disolución dela recibida no territorio español.

Artigo 13. *Fin da vía administrativa.*

Os actos e acordos do Consello de Ministros, do Ministerio de Administracións Públicas e do Ministerio de Asuntos Exteriores e Cooperación previstos neste real decreto poñen fin á vía administrativa.

Disposición adicional única.

Os custos que deriven da aplicación deste real decreto atenderanse coas dotacións orzamentarias ordinarias dos departamentos afectados.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.3.^a e 18.^a da Constitución.

Disposición derradeira segunda. *Vixencia.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 18 de xaneiro de 2008.

JUAN CARLOS R.

A vicepresidenta primeira do Goberno
e ministra da Presidencia,

MARÍA TERESA FERNÁNDEZ DE LA VEGA SANZ